



# RAMAKRISHNA MISSION SHILLONG

51<sup>st</sup> CULTURAL COMPETITION, 2025

Language: Bengali  
Date: 13.07.25

Group: D

Class: III - IV  
Time: 11.00 A.M.

সুখ দুঃখ

- রবীন্দ্রনাথ ঠাকুর

বসেছে আজ রথের তলায়  
স্নানযাত্রার মেলা-  
সকাল থেকে বাদল হল,  
ফুরিয়ে এল বেলা।  
আজকে দিনের মেলামেশা  
যত খুশি যতই নেশা  
সবার চেয়ে আনন্দময়  
ওই মেয়েটির হাসি-  
এক পয়সায় কিনিছে ও  
তালপাতার এক বাঁশি।  
বাজে বাঁশি, পাতার বাঁশি  
আনন্দস্বরে।  
হাজার লোকের হর্ষধ্বনি  
সবার উপরে।  
ঠাকুরবাড়ি ঠেলাঠেলি  
লোকের নাহি শেষ,  
অবিশ্রান্ত বৃষ্টিধারায়  
ভেসে যায় রে দেশ।  
আজকে দিনের দুঃখ যত  
নাই রে দুঃখ উহার মতো,  
ওই-যে ছেলে কাতর চোখে  
দোকান-পানে চাহি  
একটা রাঙা লাঠি কিনবে  
একটি পয়সা নাহি।  
চেয়ে আছে নিমেষহারা,  
নয়ন অরুণ-  
হাজার লোকের মেলাটিরে  
করেছে করুণ।